

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԱԶԳԱՅԻՆ ԺՈՂՈՎԻ ՆԱԽԱԳԱՀ  
պրն Ս. ԹՈՐՈՍՅԱՆԻՆ

### Հարգելի պարոն Թորոսյան

Ձեզ ենք ներկայացնում Հայաստանի Հանրապետության կառավարության եզրակացությունը Հայաստանի Հանրապետության Ազգային ժողովի պատգամավորներ Աշոտ Աղաբաբյանի, Արման Սահակյանի, Վարդան Այվազյանի, Ռաֆիկ Գրիգորյանի, Արմեն Աշոտյանի, Կարեն Ավագյանի և Գալուստ Սահակյանի՝ օրենսդրական նախաձեռնության կարգով ներկայացրած «Գյուղատնտեսական նշանակության հողատարածքներից հողի հարկ վճարողներին հարկային արտոնություններ տրամադրելու մասին» Հայաստանի Հանրապետության օրենքի նախագծի վերաբերյալ:

1. Հայաստանի Հանրապետության կառավարությունը դեմ է գյուղատնտեսական նշանակության հողատարածքներից հողի հարկի արտոնությունների տրամադրմանը թե՛ ֆիզիկական, թե՛ իրավաբանական անձանց: Անընդունելի է կազմակերպությունների համար արտոնությունների նախատեսումը: Կարծում ենք, որ տույժերի և տուգանքների գծով արտոնությունների սահմանումը կբերի հարկային կարգապահության անկման, հարկ վճարողների մոտ կստեղծի հարկային պարտավորությունների չկատարման անպատժելիություն: Նախագծում անհրաժեշտ է նախատեսել արտոնությունների տրամադրման այնպիսի մեխանիզմ, ինչը կնպաստի հողի հարկի ապառքների կրճատմանը, մասնավորապես, հարկատուները հողի հարկի չվճարված տույժերից պետք է ազատվեն չվճարած հարկի գումարների՝ մարմանը համամասնորեն:

2. 2-րդ հոդվածով ներկայացված գյուղատնտեսական նշանակության հողատարածքներից հողի հարկի դիմաց Հայաստանի Հանրապետության օրենսդրությամբ հաշվարկված և վճարված տույժերի ու տուգանքների գումարների ընթացիկ կամ առաջիկա վճարումների հաշվին հաշվանցումը՝ հարկատուի հողի հարկի գծով, գտնում ենք ոչ նպատակահարմար:

Դա կբերի համայնքների բյուջեների արտոնության տրամադրմանը հաջորդող տարիներին եկամուտների կորստի: Այդ կապակցությամբ առաջարկում ենք հողվածը հանել:

3. 4-րդ հողվածում անհրաժեշտ է վերանայել օրենքն ուժի մեջ մտնելու ժամկետը, քանի որ, ներկայացված խմբագրությամբ օրենքի ընդունման դեպքում, հողի հարկ վճարողներն, իմանալով հարկային արտոնությունների մասին, մինչև 2009 թվականի հունվարի 1-ը չեն վճարի հողի հարկը:

4. Անհրաժեշտ է հստակեցնել, թե Հայաստանի Հանրապետության հողային օրենսգրքին համապատասխան նպատակային նշանակության որ հողամասերի համար է սահմանվում արտոնությունը: Նախագծում նշված «գյուղատնտեսական նշանակության հողատարածքներ» հասկացությունը չի վերաբերում բնակավայրի սահմաններում գտնվող տնամերձ հողամասերին, որոնք համարվում են բնակավայրի նշանակության հողամասեր:

Ելնելով շարադրվածից՝ Հայաստանի Հանրապետության կառավարությունը ներկայացված օրենքի նախագիծն այս տեսքով համարում է անընդունելի:

Միաժամանակ հայտնում ենք, որ ներկայացված օրենքի նախագիծը Հայաստանի Հանրապետության Ազգային ժողովում քննարկելիս՝ հարակից զեկուցմամբ հանդես կգա Հայաստանի Հանրապետության տարածքային կառավարման նախարարի տեղակալ Վ. Տերտերյանը:

Ս. ՍԱՐԳՍՅԱՆ